



Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarneri pillugit inatsit (Pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnera, inuit atornerlunneqarnerisa pinerluutinngortinneqarnerat, kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat, pineqaatissiinerup aalajangersarneqarnerani pissutsit sukannernerulersitsisut, toqutsisutut eqqartuussaasimasut immikkoortortaqarfimmi matoqqasumi pineqaatissinneqarnermik naammassineqarnissaannut inissinneqartarnerat il.il.) pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut

(Meeqqanut, Inuusuttunut, Inatsisit Atuutinneqarnerannut Naligiisitaanermullu Naalakkersuisoq)
(Siullermeerineq)

Naalakkersuisut siunnersuuteqarnerinut qujanaq.

Inatsiseqarnermut tunngasunut allannguutinik suliaqartilluta, naggaterpiaani tunngaviulluinnartumut tunngassuteqartarpoq. Toqqissisimanissamut tunngassuteqartarpoq. Naapertuilluarnissamut tunngassuteqartarpoq. Aamma aaqqissuussaanerup imminermut illersuineranik innuttaasut tatiginnissinnaanissaannut tunngassuteqartarpoq.

Pinerluttuliornermi eqqugaasut Demokraatinit ersarilluinnartumik tapersorsorpagut. Pinerluttuliornermiuna eqqugaasut illersorneqartussaasut. Pinerluttuliornermiuna eqqugaasut misigisimasussaasut, misigisaat inuiaqatigiinnit pimoorunneqartut. Inatsisittalu ilusilersorneqarnerini inatsisitigut naapertuilluartoqarneranik innuttaasut misigisimanerat aalajangiisussaaq.

Tamanna pillugu siunnersuummi matumani suliniutit isumalluarfigisorujussuuagut.

Siunnersuut pisariaqartunik, isumatusaartunillu arlalitsisut sukaterivoq. Pisortani sulisunut kissaatigineqanngitsumik, innarliisumik nikanarsaasumillu pissusilersornerup pinerluutinngortinneqarnerata ersarissumik takutippaa, inuit ataatsimoornitsinnut sulisut ilungersortinneqarnissaat, siorasaarneqarnissaallu akuersaangikkipput. Ataatsimut inuiaqatigiinnitsinnik pingaarutilimmik illersuineruvoq.

Inuit atornerlunneqarnerisa pinerluutinngortinneqarnerat taamatulli ippoq. Inuit kikkulluunniit ersarilluinnartumik naleqqutinngitsunik atugassaqartinneqarlutik sulissanngillat. Inuit ataasiakkaat naleqassusaannut, ataqqineqarnissaannullu tunngassuteqarpoq.



DEMOKRAATIT

Ilutigisaanik kinguaassiuutitut tunngasumik atortussat innarliissutaasut akiorniarlugit suliniutit annertusineqarnissaat pingaaruteqartorujussuuvoq. Digitaaligit ineriartornerup kingunerisaanik atortussanik ingerlatitseqqinnissaaq, siammarterinissarlunni ajornannginnerulernikuuvoq, tamanna pingaartumik meeqqanut, inuusuttunullu annertuumik ajoqusiinnaalluni. Taamaattumik inatsisip malinnaanera, ersarissunillu killissaliinera eqqorluinnarpoq.

Pissutsinik sukannernerulersitsisunik atortuulersitsisoqarniarnera pitsaasutut aamma isigaarput. Iliuutsip sakkortussusaanut naapertuuttumik pinerluutit imaannaangitsut kinguneqartinneqarlutik, inatsisitigit naapertuilluartoqarneranik innuttaasut misigisimaneritut aalajangiisuuvoq. Assersuutigalugu aaqqissuussaasumik pinerluttuliorneq imaluunniit qinngarsuilluni pinerlunnerit pineqartillugit, pineqaatissiinissap nalilerneqarnerani tamanna aamma malugineqarsinnaassaaq. Tamanna naapertuilluarnermik, ersarissumik pilersitsissaaq.

Kiisalu toqutsisutut eqqartuussaasimasut immikkoortortaqaarfimmi matoqqasumi pineqaatissinneqarnermik naammassineqarnissaannut inissinneqartalernissaat pingaarutilimmik alloriarneruvoq. Inuit imaannaannginnerpaasinnaasumik pinerluuteqarsimasut pineqaatissinneqarnermik naammassineqarnissaannut ammasunik sinaakkuteqaqqaarnissaat nassuiaatigiuminaattarpoq. Pinerluutigisimasap suussusaanut, pinerluttuliornermilu eqqugaasunut aaqqissuussaanerup naapertuunnissaa aalajangiisuulluinnarpoq.

Ataatsimut isigalugu suliniutissatut allaatigineqartut pitsaapput, ajunngitsumullu tamarmik siunnerfeqarlutik. Innuttaasunik illersuinermit annertusaataassaaq. Pinerluttuliornermi eqqugaasunut ataqqinninnermik annertusaataassaaq. Inatsiseqarnittalu innuttaasut naatsorsuutigisaattut, inatsisitigit naapertuilluassusermik misigisimanermit naapertuunnissaata qulakkeerneqarnissaanut tapertaassalluni.

Tamanna pillugu siunnersuummi suliniutigineqartut tamaasa Demokraatit tapersorsorpagut.

Taamatut oqaaseqarlunga siunnersuut akuerineqassasoq, Inatsisinullu Ataatsimiititaliami nangillugu suliarineqassasoq inassutigaaq.